

YKN perlu kerjasama pelbagai pihak laksanakan kebajikan

UB 19.9.18 195.

KOTAKINABALU: Syarikat korporat, badan swasta, institusi kewangan dan institusi pengajian tinggi di negara ini digesa menjalin kerjasama dengan Yayasan Kebajikan Negara (YKN) bagi membantu pesakit yang memerlukan rawatan dialisis.

Timbalan Perdana Menteri Datuk Seri Dr Wan Azizah Wan Ismail berkata kerjasama pintar dengan pelbagai pihak amat penting demi kebajikan dan kelangsungan hidup kumpulan sasar yang memerlukan rawatan berkenaan.

“Bagi penubuhan dan pengoperasian YKN Dialisis ini, pihak YKN mendapat sokongan dan kerjasama pelbagai pihak termasuk syarikat korporat dan badan swasta serta institusi pengajian tinggi sama ada melalui sumbangan mesin dialisis, barangan keperluan dan ubat-ubatan atau penajaan pesakit,” katanya ketika berucap bersempena lawatan ke Pusat Dialisis Universiti Malayisa Sabah (UMS)-YKN Sabah di sini, pada Isnin.

Turut hadir Timbalan Ketua Menteri Sabah Christina Liew dan Naib Canselor UMS Datuk Dr D Kamarudin D Mudin.

Dr Wan Azizah yang juga pengerusi Lembaga Pemegang Amanah YKN berkata sehingga kini YKN telah menubuhkan enam pusat dialisis di seluruh negara iaitu, YKN Dialisis Lembah Pantai, Kuala Lumpur, YKN Dialisis Rompin, Pahang, YKN Dialisis Kota Bharu, Kelantan, YKN Dialisis Kuala Terengganu, Terengganu dan Pusat Dialisis UMS-YKN.

Beliau berkata pemilihan lokasi pewujudan pusat dialisis adalah berdasarkan jumlah pesakit yang memerlukan rawatan dialisis.